

善本書室藏書志

善本書室藏書志卷五

錢塘丁丙松生甫輯

經部十

新刊爾雅三卷

明景泰刊本

郭璞注

前有璞序每卷後均附釋音後有景泰七年丙子八月賜進士出身通議大夫應天府府尹和陽馬諱識云爾雅一書始於中古盛於西漢迨至東晉復得郭景純爲之注凡天地古今綱常倫理萬事之義鳥獸草木宮廬服食百物之名罔不提挈綱領訓釋字義誠博物之捷徑讀書之指南歷久傳錄魚豕多舛因訂正鍤梓釋言臞瘠瘠也邢疏述注云齊人謂瘠瘦爲臞今各本注無瘦字此不誤釋訓如琢磨自修也注云玉石之被雕磨按釋器雕謂之琢今各本皆作琢而此不誤釋器綴呂謂之九

鼓邢疏注今江東呼爲緩而此本亦作呼不作謂釋天疾雷謂之靈霓左傳疏引郭注雷之急激者也今各本皆作急擊而此本作激不誤又如釋言弇同也注引詩曰奄有龜蒙奄字無所本疑正文弇本作奄且上文弇同也與下文弇蓋也二弇字亦重今此本作奄同也更可訂經文之誤書貴舊本信夫

爾雅三卷

明刊本

蕭山徐北溟藏書

晉郭璞景純注

前有璞序次邢昺序此本爲慈水葉自本茂叔糾正武林陳趙鶴天浮重較而嘉慶五年徐氏鯤北溟据唐石經校正並引諸家之說疏證之洵善本也鯤字北溟一字白民蕭山楊樹莊人補縣學生家貧無以自給乃赴杭州販書度日暇輒繙閱因通聲音訓詁之學嘗爲文達分撰經籍纂詁文達頗重之

爾雅三卷

日本影宋刊本

郭璞注

前有璞序音釋另刊在每卷之後末有日本天保甲辰益城松崎復識云此北宋仁宗時刻版南宋高宗時補刊敬驚引殷匡胤玄朗恒楨貞禎微等字皆缺筆其補刊者版心各有重刊重開記又桓邁二字缺筆餘滿購等字及桓字係原刻皆不缺筆又按晁氏讀書志曰爾雅有釋知騫及陸玄朗釋文母昭裔以一字有兩音或三音後學生疑於呼讀釋其文義最明者爲定有爾雅音畧三卷今此音釋亦分三卷或係音畧舊本歟

新刻爾雅三卷

明刊本

晉郭璞注

此爲明胡文煥校刊前有璞序上中下三卷每卷後附音釋有耕讀山房珍藏一印

爾雅注疏十一卷

元刊黑口本

郭璞注邢昺疏

卷前有序題翰林侍講學士朝請大夫守國子祭酒上柱國賜紫金魚袋臣邢昺奉敕校定次爾雅兼義每卷俱有下卷標題而不別爲卷若汲古閣所刊則俱刪削也每半葉九行行二十字注二十一字有正德間修補之葉

爾雅注疏十一卷

明閩刊本

葉氏得一居藏書

晉郭璞注宋邢昺疏

首有注疏序題翰林侍講學士朝請大夫守國子祭酒上柱國賜紫金魚袋臣邢昺奉敕校定按元槧爾雅注疏卷一釋詁分上中下卷二釋言分卷下卷三釋訓釋訓下釋親卷四釋官釋器釋器下卷五釋樂釋天釋天下卷六釋地釋邱卷七釋山釋水卷八釋草釋草下卷九釋木釋木下釋蟲卷十釋魚釋鳥下釋鳥卷十一釋獸釋畜分卷極無義理蓋仍元本之舊其疏文

脫失處悉與元本同其佳者多與單疏本合每半葉九行每行經二十一字注疏低一格每行二十字經下載注單行居中標陰文注字分經注疏爲大中小三等字此明御史李元陽所刊十三經注疏之末有得一居珍藏印

爾雅補注四卷

寫本

海甯周春范兮

春字范兮號松靄海甯人乾隆甲戌進士官廣西岑溪知縣歸田後坐墨華館以著述爲事四部七略靡不瀏覽前有自序云幼讀爾雅惟知景純後見夾漈注多補前人所未備復好之郭博而鄭精是書無餘蘊矣因旁及諸家之說彙爲一編頗以管見參之有天台齊召南嘉定王鳴盛兩序

小爾雅一卷

明刊本 盧抱經藏書

漢魯人孔鮒著潘之淙閱

此爲孔叢子中之第十一篇分廣詰廣言廣訓廣義廣名廣服
廣器廣物廣鳥廣獸而益以度量衡爲十三章頗足資攷披閱
者潘之淙乃吾杭人盧學士文弼手爲校正有名印

輶軒使者絕代語釋別國方言十三卷

明鈔本

按舊本題漢揚雄撰東漢無稱及者應劭風俗通義序始云周
秦常以歲八月遣輶軒之使求異代方言還奏箱之藏於祕室
及嬴氏亡遺棄脫漏後嚴君平林間翁孺才有傳之者雄好之
天下孝廉衛卒交會周章質問以次注續二十七年爾乃治正
凡九千字魏孫炎注爾雅晉杜預注左傳始遞相徵引及郭璞
遂注其書并加序焉宋慶元庚申李孟傳刊版有序宋質有跋
錢遵王讀書敏求記有正德己巳影鈔宋本謂二卷中吳有館
娃之宮秦有榛娥之臺俗本脫秦有二字馮已蒼嘗笑曰并榛
娥而吳之矣此卷既不脫秦有且亦從正德本出者其中字句

不譌寫尤近古可珍

輅軒使者絕代語釋別國方言十三卷

舊鈔本

勞氏丹鉛精舍藏

前有郭璞序後有慶元庚申仲春甲子曾稽李孟傳庚申重午
東陽朱質兩序此卽戴氏疏證所稱曹毅之本也卷十虺兒也
注云此音義所未詳各本此誤皆卷十一南楚之外謂之螭螭
注非呼虺蛭俱誤旺頃此二處似勝各本而戴校本亦所未及
特表出之寫本字畫寬展諱多缺筆不但鈔從宋出疑版匡行
款亦依宋刊也有丹鉛精舍勞權之印平甫諸圖記曾經塘栖
勞氏所藏

輅軒使者絕代語釋別國方言十三卷

抱經堂刊定重校本

漢揚雄紀晉郭璞注

前列乾隆四十七年五月朔杭東里人盧文弨重校方言序次
列方言讐校所据新舊本爲宋曹毅之本明永樂大典本明正

德丁卯華珪本明新安吳琯本明新安程榮本明武林何允中
本明錢塘胡文煥本明鄭璞編于雲集本明天啟丁卯虎林郎
奎金本明海甯陳與郊類聚本曲阜新刻新安戴東原校本臚
十一舊本而加精校其善可知前後有郭璞序李孟傳序朱質
跋之外多雄述方言書兩篇刊成之後又列校正補遺一卷刷
成之後又加覆校數條故卷首印文曰精校善本得者珍之又
有抱經堂藏盧文弨弓父手校諸印

釋名八卷

嘉靖翻宋刊本 馬芻齋藏書

劉熙字成國撰

前有熙自序曰夫名之於實各有義類百姓日稱而不知其所
以之意故推天地陰陽四時邦國都鄙車服喪紀下及民庶應
用之器論敘指歸謂之釋名凡二十七篇又題云右釋名八卷
館閣書目云漢徵士北海劉熙字成國撰推揆事源釋名號致

意精微崇文總目云熙卽物名以釋義凡二十七目臨安府陳道人書籍鋪刊行又嘉靖三年高陵呂柟識云校正八十餘字谷泉儲良材邦掄據而翻雕並撰序言有馬玉堂觀漢唐齋兩印

新刻釋名八卷

明胡文煥刊本

孫淵如手校本

漢劉熙成國撰

是書前有熙自序及目錄卷一首葉有淵如先生朱字手書一行曰陽湖孫星衍校於嶺南八卷末葉朱筆記曰九月十六日校畢前後朱筆校改處極爲精審前後有孫星衍印白文方印新刻廣雅十卷

明司校影宋本

王氏十萬樓藏書

魏張揖著撰隋曹憲音解明胡文煥校正

前有揖上廣雅表按揖字稚讓清河人太和中官博士其名或從木然以字爲證當作揖讓之揖憲隋祕書學士後事唐太宗

嘗讀有奇難字輒遣人問之具爲音注援驗詳覈此書凡不在爾雅者著於篇仍用爾雅舊目元和顧廣圻記云嘉慶壬戌在西湖與蕭山徐君北溟同往孤山尋以嘉靖刊韓詩外傳見贈乃檢此報之北溟熟於此學者也影宋本今藏黃蕘間處向曾爲之用畢效欽刊本校出有以借王懷祖先生今載入疏證中後又記云凡此本脫落處畢效欽本有之其改正出畢本外者又得百十字影宋本之所以爲獨善於他刻也又晚間居士記云嘉慶壬戌北溟在詒經精舍爲芸臺侍郎續勘經籍纂詁其時千里以校勘十三經同寓精舍此書乃所贈也明年北溟死此書歸於我庚午十月六日檢篋得之追憶故人爲之憮然北溟名鯤晚間者王宗炎也

博雅十卷 明刊本 虞抱經藏書

魏張揖纂輯隋曹憲音釋

前有揖上博雅表乾隆丙子正月盧文弨以吳琯本校有文弨
校正盧文弨字紹弓盧氏藏書三印

博雅十卷 明刊校本

魏張揖纂輯隋曹憲音釋

此與盧校本同一版印前缺表文不知何人朱筆校正幾滿葉
幅有印蘇珍藏子孫永保鬻及借人爲不孝叔美過眼四印

廣雅十卷 明刊校本

魏張揖撰隋曹憲音解

此爲明葉自本重訂耶奎金糾譌本版心有堂策檻三字前鈔
上廣雅表并十卷目錄又臚記通志藝文畧昆蟲草木畧序冊
府元龜學校部崇文總目小學上新唐書藝文志隋書經籍志
舊唐書經籍志晁氏郡齋讀書志陳氏書錄解題隨齋批注爾
雅釋草疏文獻學校攷續文獻六書攷玉海藝文朱氏經義攷

之載博雅卷數者以資攷證又影鈔吳本泰序一篇加之朱墨
校正可謂勤力於此書者矣有大興金氏繩齋藏書之印繩齋
金紹綸印金荅之印諸圖記

重刊埤雅二十卷

明刊黑口本

中大夫尚書左丞上柱國吳郡開國公賜紫金魚袋陸佃撰

佃字農師山陰人熙甯三年擢進士甲科授蔡州推官召補國
子監直講後以中大夫知亳州卒於官宋史有傳是書凡釋魚
釋獸釋鳥釋蟲釋馬釋木釋草釋天八門皆因名物以求訓詁
因而旁通於經義胥里瞿氏書目云錢塘汪氏師韓嘗見宋刻
有其子陸宰序文又總目外每卷各有目次此本宰序雖失而
總目卷目俱存猶具宋本之遺

埤雅二十卷

明嘉靖修成化刊本

前有宣和七年六月旦男朝請郎直祕閣權發遣淮南路計度

轉運副使公事借紫金魚袋宰撰序云先公嘗進說魚說木二篇自是益加筆削號物性門類編纂將終而永裕上賓先公旋亦補外事簡政清得專論撰既注爾雅乃廢此書號卑雅言爲爾雅之輔也前有成化十五年浙江按察司副使新喻胡榮重刊序云初刻於宣和七年厥後五世孫齋又刻諸贛州郡庠屢經兵燹百有餘年未覩宣和舊書同寅劉君廷吉訪得於前兵部尙書杭城徐貞襄公之家命工重刻屬余序諸卷首嘉靖二年長洲王偉跋云右埤雅處州版刻久而湮裂學者病之予竊祿於此懼典籍之弗傳也因屬麗水程學諭憲完其殘剞正其譌舛而梓之每卷前仍各有目次有南陽葉氏圖書玉環小園公諸印

爾雅翼三十二卷

明萬厯刊本

是書宋羅願撰元洪焱祖音釋願字端良號存齋歙縣人乾道

二年登進士第通判贛州酒稅中知南劍州事遷知鄂州卒於
官焱祖字潛夫與願同籍天歷中官遂昌縣主簿以休甯縣尹
致仕前有願自序咸淳間方回從其從孫裳訪得副本王應麟
爲韻語序而付梓回跋之迨延祐七年焱祖又加音釋并釋羅
王二序郡守朱舜又刻之此萬歷乙巳少保兵部尙書長垣李
化龍重刊而並序之裔孫文瑞跋後者也至其書之分草木鳥
獸蟲魚爲六類引據精確持論謹嚴凡五萬餘言皆從心胸流
出非與掇拾餽餌以求奇前人論之已詳不待贅述已

別雅五卷

精鈔本

盧抱經校藏

淮安山陽吳玉搢比輯

玉搢字山夫山陽廩貢生官鳳陽府訓導是書取字體之假借
通用者依韻編之各注所出而爲之辨證足以通古籍之異同
疏後學之疑滯猶可以攷見漢魏以前聲音文字之槩前有

南程嗣立鏡湖王家貲兩序有東里盧氏弓父書冊東里抱經堂記白首尚鈔書抱經堂寫校本諸印

西域爾雅一卷

舊鈔本

東吳王初桐纂述

嘉慶元年五月自序云經義攷引宋志有羌爾雅遂初堂書目有蕃爾雅蜀爾雅其書皆軼不傳惟翻譯名義一編刊本猶存且散見於佛經採錄於四部彙此西方梵語之可攷者也今之新疆若準若回若蒙古若布魯特若帕爾西若哈薩克若溫都斯坦若克什米爾若哈拉替良若郭罕若西番若藏其方言度詞大抵皆前人記載所不及茲從西域同文記西域圖識西域聞見錄等書撮合成編仍依爾雅十九篇之例名曰西域爾雅竊比於羌爾雅番爾雅佛爾雅之類錄而存之亦博雅之一助也

右小學類訓詁之屬

新刻急就篇四卷

明胡文煥刊本

盧抱經校藏

漢史游撰唐顏師古注宋王應麟音釋

漢書藝文志注稱游爲元帝時黃門令是書或稱急就章故其字謂之章草凡三十四章字以類從而不立門目自始至終無一複字文詞雅奧非蒙求諸書所能及舊有曹壽劉芳豆盧氏顏之推注解皆軼今惟存師古注及王應麟音釋前有抱經學士補鈔秘書監宏文館學士上護軍瑯琊縣開國子顏師古撰序及清熙十年歙羅願浚儀王應麟後序并以厚齋補注與汲古本校正有家世珍藏王棟之印永年伯章盧氏文弼校正諸印

說文解字繫傳四十卷

盧抱經校正刊本 梁山舟藏書

文林郎守秘書省校書郎臣徐鉉傳釋朝散大夫行秘書省校書

郎臣朱朝反切

按錯字楚金廣陵人起家南唐元宗朝後主以爲屯田郎中知制誥集賢殿學士酷嗜讀書博記精小學與兄鉉齊名列近侍時方晉之二陸而錯獨於江南未破前病卒白幸得免俘虜云是書首通釋三十卷以許慎原本十五篇析而爲二凡錯所發明列於愼注後題名以別之次部敍二卷通論三卷祛妄類聚錯綜疑義系述各一卷後有照甯己酉冬傳監察王聖美本翰林祇候劉允恭等篆子容題并跋子容者蘇頌也又有乾道癸巳尤袤跋原本宋已殘闕多以其兄鉉所校說文竄補四庫館悉爲攷訂釐正注敍淑以稿本付梓且刊附錄一卷盧文弨復校正之梁同書復手爲校過以贈嚴元照故又有元照之印芳荃堂印香修諸印同書字元穎號山舟錢塘人乾隆壬申進士官至翰林院侍講嘉慶丁卯重宴鹿鳴加待講學士銜工詩

善書年九十二卒

說文繫傳攷異一卷附錄一卷

鈔本

右書因說文繫傳世無善本傳寫譌脫殆不可讀乃雜攷諸書正其異同附錄一卷皆諸家論繫傳語也汪啟淑刊繫傳四十卷并附錄而遺此攷異乾隆壬辰開四庫館採訪遺書武林諸藏書家各以善本經大吏彙進於朝先後凡五千餘種浙撫復令振綺堂後人汪汝璣增選百種續進遂以此應選題爲汪憲撰實則朱文藻所校錄也有文藻三跋文藻字朗齋自號碧溪居士錢塘諸生此誠吾杭藝林掌故也

說文解字韻譜五卷

舊鈔本

右爲南唐贈禮部侍郎廣陵徐鉉撰兄鉉序云舍弟楚金特善小學因命取叔重所記以切韻次之聲韻區分開卷可觀楚金又集通釋四十篇攷先賢之微言暢許氏之元旨正陽冰之新

義析流俗之異端文字之學善矣盡矣今此書止欲便於檢討故聊存訓詁以爲別識按通釋者卽說文繫傳也此書舊有元刊本爲朱彝尊所藏乾隆癸巳汪啟淑進呈四庫館甲午御題簡端發還本家收藏猶憶咸豐辛酉十一月中旬粵匪入圍杭城時已絕糧陳季鴻表文爲其友黃鳳超持以易米余家亦斷炊因重其書勉贈米數溢而領其書閱數日城陷書定付之浩劫矣今檢舊鈔本忽解前事謹記於此

新刊大廣益會玉篇三十卷

明益藩刊本

此書前刻玉篇廣韻指南一卷而無大中祥符六年牒文及顧野王序啟惟首列萬厯初元益王一齋序文云我聖祖高皇帝命儒臣有洪武正韻之作而於玉篇廣韻二書仍之不廢第中多脫畧我先考端王取二書詳加校訂正其譌謬補其闕畧既統以四聲復繫以韻母而凡音釋反切簡明詳審覽者不事窮

探而音義無餘蘊矣是編較野王所著增收三千七百字題曰
增修玉篇編成猶不敢自是靳祕弗傳未幾奄棄我先兄莊王
既序廣韻而梓之獨是編猶有志未逮予以寡昧忝紹先封檢
閱藏書手澤宛然亟命工鐫行與海內博文者共之後有益世
孫翊劄謹跋殆足與原編參閱也

大廣益會玉篇三十卷

明開封府翻元刊本

此書前有大中祥符六年都大提舉玉篇所牒一道并記梁大
同九年三月二十八日黃門侍郎兼太學博士顧野王撰本唐
上元元年甲戌歲四月十三日南國處士富春孫強增加字三
十卷凡五百四十二部舊一十五萬八千六百四十一言新五
萬一千一百二十九言新舊總二十萬九千七百七十言注四
十萬七千五百有三十字次野王序啟各一篇又總目及玉篇
廣韻指南一卷其釋神珙反紐圖卽在其中謹按 天祿琳瑯

元版經部所載與此正同後考曰此校宋板大廣益會玉篇尺
寸加贏紙色墨光遜其古潔篇目字數兩書相同而此多玉篇
廣韻指南一卷玉篇下綴以廣韻二字強爲牽合非復宋槧之
舊明矣今版刻寬贏惟印刷模糊與廣韻一式殆明翻元本者
也

玉篇三十卷

張氏澤存堂刊本 厲樊榭藏書

卷首題大廣益會玉篇一部凡三十卷梁大同九年顧野王撰
唐上元元年孫強增并新舊字數野王序啟前有朱彝尊序謂
顧氏玉篇唐上元末孫強稍增多其字至宋陳彭年吳銳邱雍
輩又重修之於是廣益者眾而玉篇又非顧氏之舊孫氏玉篇
去古未遠猶愈於今之所行大廣益玉篇復上元而古之小學
存焉矣其實祇刪去大中祥符牒文及指南一種多神珙反紐
圖與分毫字樣耳若謂卽是上元本亦無確證此本康熙癸未

吳郡查山六浮閣主人張士俊所刊行吾杭厲徵君所藏有香
雪厲鶚兩印故特存之鶚字太鴻號樊榭錢塘人康熙庚子舉
人乾隆丙辰徵試博學鴻詞讀書等身搜奇愛博尤熟於宋元
以來叢書稗說人無敢難之者詞直接碧山玉田簪有樊榭山
房詩文集

千祿字書一卷

丁希曾校本

吳國亭藏書

朝議大夫滌沂豪三州刺史上柱國贈祕書監顏元孫撰第十三
姪男金紫光祿大夫行湖州刺史上柱國魯郡開國公真卿書

按元孫爲吳興之父真卿之諸父也大厯九年真卿官湖州時
嘗書是編勒石開成四年刺史楊漢公復摹刻於蜀有自記紹
興壬戌梓學教授成都句詠有跋是書爲章表書判而作故曰
千祿其例以四聲隸字又以二百六部排比字之後先每字分
俗通正三體頗爲詳核此前有乾隆己丑立夏吳城記云先君

予舊藏有宋本古香馥郁余少時曾見之後歸姚江蘇先生滋
恢聞其家遭回祿未知玉石俱焚否又云丁君希曾精於小學
此本藉其校勘朱筆改正者悉是可寶也有吳城敦復兩印
佩觿三卷 丁希曾校本 吳興亭藏書

朝請大夫國子別易博士上柱國臣郭忠恕記

按忠恕字恕先洛陽人著汗簡與此書此上卷備論形聲譌變
之由分三科一造字二四聲三傳寫中下二卷則取字畫疑似
者以四聲分十段曰平聲自相對曰平聲上聲相對曰平聲去
聲相對曰平聲入聲相對曰上聲自相對曰上聲去聲相對曰
上聲入聲相對曰去聲自相對曰去聲入聲相對曰入聲自相
對未附與篇韻音義異十五字又附辨證舛誤一百十九字卷
尾載郭忠恕傳及談苑集古跋尾嘉祐雜誌玉壺清話塵史五
代史補所記忠恕諸條按丁希曾名傳錢塘諸生敬之次子

藏書志卷五

三

續千文一卷

寫本

左朝散大夫知池州軍州事賜紫金魚袋侍其良器撰

是編皆撫周興嗣千字文所遺之字仍仿其體製編爲四言韻語詞采頗有可觀其孫嘗刻石浯溪後有乾道乙酉鄉貢進士謝褒跋案良器名瑋以字行蘇州長洲人宋皇祐二年進士屢知名郡著有政績攷畧里瞿氏藏書記尙有紹興戊午左正議大夫充顯謨閣待制提舉江州太平觀葛勝仲序此本無之又攷葛剛正撰重續千字文注云侍其公續千文余爲之註注今亦佚失矣

歷代鐘鼎彝器款識法帖二十卷

影摹宋本

倪闡公藏書

此書爲宋薛尚功撰尙功字用敏錢塘人紹興中以通直郎僉定江軍節度判官廳事晁公武讀書志宋史藝文志所載卷數均合鉤摹古器銘詞爲之箋釋大抵以攷古博古二圖爲主而

更撫拾以附益之其訂譌攷異具有辨證明崇禎中朱謀聖序
稱得其手蹟刊布於世此雖寫本鈎勒尤見筆法末有孟顥鑒
定嘉熙三年外孫楊伯岳拜觀及弁陽周密至正元年博士柯
九思方外張天雨至正元年靈武韓玉倫徒克莊至正七年姑
蘇王行番陽周伯溫又鄞豐坊諸題跋皆從手蹟摹出者有倪
燦之印間公師劉越石儒師馬文肅佛嗣熊襲庵四印燦字間
公號雁團江南人康熙丁巳舉人召試博學鴻儒授翰林院檢
討

字通一卷

精寫本

重遠樓藏書

前有彭山李從周自序云字而有隸蓋已降矣每降而輒下不
可不推本之也此編依世俗筆勢質之以說文解字作楷隸者
於此而推之思過半矣名之曰字通又有嘉定十三年六月魏
了翁序寶祐甲寅秋虞阮題識是書僅著於書錄解題張世南

游宦紀間載李君爲魏鶴山辨論協協二文稱其留心字學今其書序正鶴山作惟所稱有吾實從周之字也乾隆戊申當塗黃鉞充四庫館寫書官得見毛氏影宋本錄其副後以贈鮑廷博嘗刻入知不足齋叢書中黃跋謂所引說文有與今本小異者如𣎵从艸茲省聲今說文乃作絲省聲未必不有功於小學也而吳騫拜經樓藏書題跋云按今說文解字作艸絲省聲此云从艸茲省聲與五經韻譜同豈字通所云說文乃韻譜耶俟再證之有重遠書樓印重遠樓爲山陰楊鼎藏書之所鼎字禹銘號守白其檢藏書有感詩云辛勤十七載書卷四萬餘積之頗不易愛惜逾璠璣今讀其遺詩尙可想其風趣

復古編二卷 精寫本

吳興張有

有字謙中湖州張先之孫嘗出家爲道士此書前後有大觀四

年陳瓘政和二年程俱兩序其書攷據精核不爲浮詞舉其一隅眞妄斯別洵有功於許氏者有至正丙戌虞集題記嘉靖甲子黎民表重梓以行此從嘉靖本影寫篆文則閩中高叔遲陂尹行篤所作筆法入古可寶也

敘古千文一卷

精寫本

宋禮部侍郎胡寅撰

後有清熙己亥朱子跋云右敘古千文故禮部侍郎胡公明仲所作其敘事立言昭示法戒實有春秋經世之志至於發明大統開示正塗則又於卒章深致意焉新學小童朝夕誦之而聞其義亦足以養正於蒙矣清江劉孟容出其先朝奉君所書八分小卷莊謹齊一所以傳家之意甚備豈亦有取於斯乎因摹刻真南康邵齋傳諸小學庶幾具有補云

重續千字文二卷

影摹本

水雲清隱丹陽葛剛正撰并篆注

前有淳祐戊申冬日剛正德卿自序按文中有申浦葛叟昭勳族胃注云伯祖丞相文定公邨繪像於昭勳崇德閣剛正忝在從孫之列先是侍其瑱撰續千文凡字已見梁千文者不復用剛正仿而重續之亦不用前二書已見之字并篆之注之吾邱衍學古編稱其篆法極好此本雖展轉摹寫其結體之工尙可概見注則萬三千餘言悉有根據洵乎足誨髫幼也

六書故三十三卷 明刊本

永嘉戴侗

按侗字仲達淳祐中登進士第由國子監簿守台州德祐中遷軍器少監辭疾不起是編主於以六書明字義謂字義明則貫通羣籍理無不明變說文之部分別分九部曰數曰天文曰地理曰人曰動物曰植物曰工事曰雜曰疑其文皆從鐘鼎其注

既用隸書又皆改從篆體非今非古致爲吾邱衍所攻然其攷據苦心於六書未嘗無所發明此書卷帙多缺海鹽徐次雲以爲元刻見贈雖亦不全仍存良友之誼爾

六書統二十卷

原刊本

趙寒山藏書

率直大夫國子監司業楊桓攷集

此書以六書統諸字故名曰統凡象形之例十會意之例十有六指事之例九轉注之例十有八形聲之例十有八假借之例十有四所列先古文大篆次鐘鼎文次小篆其說謂文簡意足莫善於古文大篆惜其數少不足於用文字借用者莫過小篆而譌謬於後人之傳寫者亦所不免今以古文證之悉復其舊此桓之自命所在也桓字武子號辛泉兗州人元史有傳至大丙申其子守義上其書詔江浙鑄版前有翰林直學士倪堅序及桓自序每葉十六行每行大約十字小字雙行每行約二十

三四字注文半以篆體作楷版心有大小字數有趙宦光兩印
王純之印紀千兩印本寒山舊物也宦光字凡夫吳縣人著有
說文長箋有寒山別業在支硎之南

周秦刻石釋音一卷 寫本

元吾邱衍撰

前有至大戊申十二月邱衍自序云昔涓熙間楊文舉以詛楚
石鼓泰山嶧山碑作周秦刻石釋音其瑯琊之碑不類秦文亦
與收入似未盡善今皆刪訂止存泰山嶧山刻字并二世詔文
正詛楚辭 釋選 二字共成一卷仍以周秦刻石爲題號云衍
字子行錢塘人

續復古編四卷 影元鈔本

元曹本撰錢大昕元史藝文志補載臧崇僧後復古編一卷劉
致復古糾謬編秦不華重類復古編十卷而不及此目此爲曹

本續吳興張隱君所作也本字子學大名人嘗爲都昌丞後出佐信州幕少好周鼓瑟石而主說文以張氏約聲分韻凡十二類二千七百六十一字用補其遺分一十三類六千四十九字將俾後人識古今文字之變而不墮於譌謬之域洵有功於字學者本自有序跋更有危素宇文公詠楊嗣蔣景武楊桓張紳諸序惜中缺上正下誘一類吳江潘氏耒藏影元鈔本世之傳錄者皆從其出耳儀徵阮氏元錄以進 御見筆經室外集提要

字鑑五卷 朱竹垞刊本

吳郡學生李文仲編

文仲長洲人自署吳郡學生其事跡無考文仲之從父伯英嘗輯類韻三十卷閱十載甫成至治中有前進士顏堯煥爲之序未幾伯英歿文仲求韻內字之未正者正之爲字鑑一編有吳

郡干文傳西秦張瑛楊李唐泳涯諸序其書久無傳本康熙己丑朱彝尊從古林曹氏鈔得之始爲刊行前有錫鬯朱彝尊印竹垞諸印蓋初刻時印本也

說文字原一卷

影寫元刊本

前有至正九年歲在己丑仲春鄱陽周伯琦溫父自序謂說文字原者本其所以然也又自撰述贊一篇大旨於許慎五百四十部增十七部刪十七部改其字者四部移易其原第使以類相從以明輾轉孳生之義分爲一十二類重爲編次自成一家之說奉直大夫國子監丞宇文公諒合此與六書正詁爲總序承德郎中書禮部員外郎臨川吳當爲後序伯琦一字伯溫官至兵部侍郎徐禎卿翦勝野聞謂其降於張士誠敗後爲明太祖所誅元史謂其歸鄱陽病卒者誤也郎瑛七修類稿復沿其說實則翦勝野聞出於依記不足爲據耳

六書正譌五卷

元刊本

孫忠愍侯祠堂藏書

鄱陽周伯琦注

前有至正十一年歲在辛卯秋九月翰林直學士大中大夫知制誥同修國史兼經筵官伯琦自序後有男宗義同門人謝以信校正一條是書以禮部韻畧部分分隸諸字列小篆爲主先注制字之義而以隸作某某辨別於下畧如張氏復古編之意後嘉靖元年滁陽干器之重刊於浙中崇禎七年胡正言又刊之皆祖此本也舊爲孫伯淵星衍所藏有手跋謂猶存元人篆法可寶有孫忠愍侯祠堂藏書記一印

漢隸分韻殘本三卷

元刊本

嚴豹人舊藏

不著撰人姓名其書取洪适等所集漢隸依次編纂又以各碑字迹異同縷列辨析足資攷證惟用一東二冬三江分韻則著書已在元時矣惜闕四卷有乾隆五十七年遂初堂初氏記長

印志伊一印嚴蔚豹人一印初氏名彭齡字頤堂萊陽人乾隆四十五年進士歷官工部尙書其送初堂所藏書多舊本精槧蔚宇豹文吳江人其二酉齋中所藏多舊籍

六書本義十二卷

明洪武刊本

孫淵如藏書

餘姚趙古則編注

按古則後名搢餘姚人宋秦悼惠王十二代孫明初徵修洪武正韻持論不協出爲中都國子監典簿尋爲瓊山教諭事蹟見明史文苑傳焦竑筆乘稱其字學最精是書併說文五百四十部爲三百六十部雖間有強合其辨別六書頗爲詳悉前有洪武十一年正月自序又有天台林右儒李鮑伯始豐徐一夔三序及凡例綱領諸圖有孫星衍五松書屋澹如珍藏諸印

六書精蘊六聲音釋一卷

明刊本

是書前有魏校自序云因古文正小篆之譌擇小篆補古文之

闕又云惟祖頡而參諸籀斯篆可者取之其不可者釐正之云
云音釋乃其門人徐官所作以釋注中奇字者後有嘉靖十九
年陸釐序按校字子才號莊渠崑山人宏治乙丑進士官國子
祭酒諡恭簡明史有傳有許晃之印鮮民石建樸夙撫書九千
字諸印

六書賦音義二十卷

明萬曆刊本

前有萬曆癸卯崑山沈鯉仲化序又乙巳知韓城縣事大梁蘇
晉序稱六書而繫以賦者何乃大司憲張公演洪武正韻而協
之歌咏以端蒙養以淑來世者也又有萬曆三十年歲壬辰都
察院右都御史前吏部左侍郎雍韓張士佩自序士佩號濂濱
韓城人嘉靖丙辰進士官至南京戶部尚書其書以諸字偏旁
分爲八十四部凡字數不敷四句難爲部者同零字爲雜部則
爲末一卷仿千字體以四言韻語聯貫之每字畧具訓詁疏明

六千餘字擇藩司吏吉禎書一條有性剛才拙晚雨山房藏書
記諸印

古文奇字一卷

明寫本

毛子晉吳兔牀藏書

譚叟龔黃集

前有自題云古文者黃帝史蒼頡所造也奇字者周太史籀所作也余好古耽奇見一古文如見三代法物見一奇字如見偉衣冠人然不經古人詩文中用過者雖古雖奇玉卮無當故每於佳文韻事中見一古文見一奇字書之片楮貯以小甕一日倒瀉案上紛若裂衲以字畫數次之用以破山中寥寂不堪令草元人見也其書自一畫至二十九畫綜五百六十三字藍格精鈔尙出明人手筆有毛晉私印汲古主人書香千載虞山毛晉子晉書印汲古得修綆仲雍故園人家筆硯情良人生一樂

毛扆之印斧季又有篆書乾隆辛卯仲冬吳氏拜經樓收藏一條又有小桐谿上人家拜經樓吳氏藏書諸印

字擘四卷

鳥本

三衢葉秉敬著

秉敬字敬君衢州西安人萬曆辛丑進士官至荆西道布政司參議是編取字形相似而義則殊者分類註之綴以四言歌訣以便記誦末有錢塘潘之洪之淳校訂篆體辨訣一篇乃以七古歌括辨篆文偏旁之同異亦頗有資於六書版心有花影軒三字又有花影軒藏書第三十六宿南崖張氏家藏諸印

三鱣堂篆韻正義五卷

明刊本

嶺南楊昌文憲卿輯義并篆

前有順德黃士俊序稱此書本洪武正韻及許氏說文六書統復古編韻會韻府原字林廣韻近而韻瑞韻譜諸書悉合以採

其精義去其謬僞又有何吾驥序并昌文自序

金石韻府五卷 朱寫本

毘陵朱雲時望輯篆雲間俞顯謨予昭校正

前有嘉靖十年南禺外史豐坊序云錫山朱時望寓雨月先生
澹江草堂得縱觀古金石文因取夏竦辭尚功楊桓諸編增損
其文按四聲列之標曰金石韻府博而精矣又有顯謨序所列
古文籀篆之字先以楷字領之亦各注其所出反切則依玉篇
諸書更列古文所出書傳目一百三十有奇按四庫存目載
林尚葵廣金石韻府五卷因朱時望金石韻府而作故名曰廣
而轉無此書其傳本之稀亦可見矣

六書正義十二卷 寫本 葉石君藏書

新安吳元滿編集

前有朱謀埠序元滿字敬甫歙縣人萬厯中布衣精意字學所

著尚有六書總要五卷六書溯原直音一卷諧聲指南一卷並
入存目此爲葉文莊所藏有葉氏萊竹堂藏書圖印

篆隸攷異二卷 寫本

古吳周靖纂集

靖字叔常爲明吏部文選司郎中周順昌之曾孫其書辨別篆
隸同異以隸字爲綱於合六書者注曰隸不合六書者注曰俗
於隸相通而隸則不相假借者注曰別而各列篆文於其下又
說文分五百四十部此則以隸字點畫多少爲次分部二百五
十有七使讀者以所共知通其所未知尋檢較易 四庫館以
長洲文倉手錄篆文著於錄此亦寫本篆法近古後有柳州魏
允枬序

經典文字攷異一卷 舊鈔本

嘉定錢大昕撰

按此書分天地人物四類以經字爲綱而以說文玉篇廣韻及隋以前經說文注詳攷其異同大有裨於讀經假借之助據潛研堂全書總目是書未經鈐版此尙當時從手藁傳錄間附以孫星衍及其弟大昭之說是又後來增入足見其虛心好學雖在後輩亦不遺其一長云

九經通借字攷十四卷

舊鈔本

嘉定錢坫學

坫字獻之江蘇嘉定人大昕族姪也乾隆甲午副貢官乾州州判是書依說文分部辨證亦極詳實精確包世臣撰坫傳及江藩漢學師承記均不載其目今以十經文字通正書校之大致互有增損而十經本較此加詳故通正書時爲梓行而此書迄未登木今讀一過辨析精詳於六書假借一門由此可知塗轍固不必因十經已刻而廢此也

右小學類字書之屬

廣韻五卷

明開封府翻元刊本

按此書世行凡二本一爲宋陳彭年等所重修一卽此本不著撰人名氏舊有孫愐唐韻序此則無之朱竹垞序重修本云以此本比重修者注文獨簡當是明代內府刊版中涓欲均字數取而刪之然四庫提要據永樂大典引此本皆曰陸法言廣韻引重修本皆曰宋重修廣韻又邵長蘅古今韻畧謂宋槧本東字注中引東不訾事重修本作舜七友而此本譌作舜之後熊忠韻會舉要已引此本則爲元時所刻非明中涓所刪也是本前有萬厯己未開封府楚應城王城序謂開郡已鐫之梨棗內有殘缺韻猶弗廣余不韻不能廣於原刻之外而補綴簡篇再見廣韻之全云云與玉篇版口一式當爲明初翻元而萬厯補修之版所刷者歟

藏書志卷五

三

切韻指掌圖二卷 精鈔本

宋司馬光撰

前有光自序云科別清濁爲二十圖以三十六字母列其上推四聲相生之法縱橫上下旁通曲暢律度精密最爲捷徑名之曰切韻指掌圖嘉定癸亥番陽董南一爲序後有明邵光祖檢例一卷洪武二十三年楮園王行題識更有甌東陳糾校正手跋

韻補五卷

明刊本 袁壽皆藏書

前有乾道三年四月武夷徐藏序云吳才老械與藏同里有連其祖後家同安才老登宣和六年進士第官太常丞忤時宰斥爲通判以終陳振孫書錄解題小學類載械韻補五卷卽此也引用書目凡五十種械識云其用韻已見集韻諸書者皆不載雖見韻書而訓義不同或諸書當作此讀而注釋未收者載之

凡字有一義卽以一條爲證或二義三義卽以二三條爲證謬誤若未盡皆俟後之君子正而成之云古韻自宋以前無專書此爲祖本耳有桐鄉沈潮曉滄校讀一條宋氏藏書五硯樓廷楷之印袁氏又愷諸印潮一名炳垣字魚門號曉滄桐鄉人嘉慶庚午舉人官江蘇海防同知有劄硯山房詩鈔

增修互注禮部韻畧殘本一卷

元刊本

甬東范氏舊藏

衢州免解進士毛晃增注男進士居正校勘重增

是書因禮部韻畧收字太狹乃蒐採典籍依韻增附又韻畧之例凡字有別體別音者皆以墨圈圈其四圍每有舛漏晃併爲釐定於音義字畫之誤皆一一辨證顧氏亭林云增修互注禮部韻畧五卷其卷端云男進士居正校勘重增乃宋甯宗以後刊本此僅去聲一卷舊爲甬東范氏遺物今檢天一閣見存書目止存卷三一本卽併而合之所闕亦多留此以見舊刻面目

藏書志卷五

三

貢舉條式一卷

影宋本

此書附於禮部韻畧之後舊爲虞山錢孫保家影鈔宋本上起元祐五年下至紹興五年凡一切增刪韻字廟諱祧諱書寫試卷格式以及攷校章程率皆臚載多有出史志之外者猶可攷見一代之典制焉

九經韻補一卷

明刊本

宋代郡楊伯喆撰

前有嘉定十七年伯喆自序云禮部韻一書爲聲律舉子設紹興間三山黃進士嘗補選進上闕畧弗備近嘉禾吳教杜復申明僅增三字僕惑滋甚若禮記斂般請以機封毛詩猗儺其枝之類庸可諉曰是喪制所出非程文所當用或音義弗順非韻語所可押至如周禮舍采合舞之爲釋菜毛詩鱸膋發發之爲鱸膋皆足證後學之傳譌助文場之官步一切置之可乎迺卽

經釋蒐羅粹爲一編云後有淳祐四年門生衢州學教授俞任禮跋按經中所補者凡七十九字各注合添入某韻內或某字下又附載音義弗順喪制所出者凡八十八字伯岳字彥思號泳齋淳祐間以工部郎守衢州

重刊改併五音集韻十五卷

明萬厯刊本

淳陽松水昌黎郡韓道昭改併重編

前有崇慶元年歲壬申韓道昇誌云大金皇統間有洩川荆璞將三十六母添入韻中隨母取切使學流詳而有的檢而無謬美矣未盡善也至泰和戊辰吾弟道昭字伯暉乃先叔諱孝彥字允中之次子於篇韻中最爲注意今重編改併五音之篇云云並有崇慶元年序與陳州司法孫恂序是書所收之字以廣韻爲粉本所增之字以集韻爲粉本惟併舊韻二百六部爲一百六十部改舊韻之字紐以三十六母分爲四等配隸顛倒其

前後爲變亂古例之始然深究要眇固非無知妄作者也
改併五音類聚四聲篇海十五卷 明萬厯刊本 陳仲魚藏書

潯陽松水昌黎郡韓孝彥次男道昭改併重編

是編以玉篇五百四十二部依三十六字母次之更以類篇及
龍龕手鏡等籍增雜部三十有七共五百七十九部凡同母之
部各辨其四聲爲先後每部之內又計其字畫之多寡爲先後
以便於尋檢書成於金明昌承安間迨泰和戊辰孝彥之子道
昭改併爲四百四十四部韓道昇爲之序明成化丁亥僧文儒
等校刊增題五音類聚四字此則萬厯重刊本前有正德十五
年太子洗馬翰林國史編修建安滕霄序有海甯陳鱣觀仲魚
圖象得此書費辛苦後之人其監我諸印

古今韻會舉要三十卷 明刊本

是書於凡例前首題昭武黃公紹直翁編輯次題熊中子中舉

要忠自序云同郡在軒先生慨然欲正千有餘年韻書之失始作古今韻會大較本之說文參以籀古隸俗凡將急就旁行敷落之文下至律書方技樂府方言靡所不究而又檢以七音六書凡經史子集之正音次音叶音異辭異義與事端倫類制度纖悉莫不詳說浩乎山海之藏也僕館公門獨先快觀惜其編帙浩瀚因取禮部韻畧增以毛劉二韻及經傳當收未載之字別爲韻會舉要一編是忠本公紹原輯而別爲一書其卷前劉辰翁韻會序正與廣韻之首載陸法言孫愐序同例耳惟又載至順二年文宗敕應奉翰林余謙校正索魯序稱其刊正補削根據不苟則又似經謙別爲更定者大約出於三人手筆矣

書學正韻三十六卷

明刊本

奉直大夫國子司業楊桓攷集

按桓既著六書統六書溯原又依韻編次是書兼以字母等韻

各分標一二三四以辨其聲之高下然或有或闕體例不一所列之字兼存篆隸二體逐字之下注云統指統形統聲統意統注者見於六書統者也注云原指原形原聲原意原注者見於六書溯原者也指卽指事形卽象形聲卽諧聲意卽會意注卽轉注省其文耳其所分韻目大槩因集韻之舊而畧加訂改焉前有武穆王孫一印殆經岳氏所藏者也

經史正音切韻指南一卷

明刊本

此書前有至元丙子關中劉鑑士明序謂暇日因其舊制次成十六通攝作檢韻之法析繁補隙詳分門類并私述元關六段總括諸門盡其蘊與名之曰經史正音切韻指南與韓氏五音集韻互相爲用自序後有嘉靖歲次甲子孟秋金臺衍法寺後裔怡庵本讚捐資重刊瀛海若愚明賢校錄萬厯戊戌衍法寺竹泉圓經重刊二條

經史正音切韻指南一卷

明萬厯刊本

此書嘉靖閒有衍法寺僧本譜刊本萬厯初僧圓經重刊今如彩又刻之當日釋子固甚重其書也

洪武正韻十六卷

明初刊本

明翰林侍講學士樂韶鳳等奉敕撰前列洪武八年三月十八日翰林侍講學士中順大夫知制誥同修國史兼太子贊善大夫臣宋濂序是書併平上去三聲各爲二十二部入聲爲十部當時頒示天下除內府刊行外周宏祖古今書刻所載如南監贛州建甯衡府平陽皆有刊本此則字大刊精白紙精印雖不標刊行何地斷非坊肆所雕有東海何生何氏董卿望楚圖書諸印

重刊併音連聲韻集成十三卷

明成化刊本

吳練川畊隱章黼集

黼字道常嘉定人年逾三十傷足難行隱居教授因篇韻音切間有差謬乃搜閱三蒼爾雅字說字林韻集韻畧說文玉篇廣韻韻會聲韻聲譜雅音諸家書通按司馬溫公三十六字母字約爲一百四十四聲辨開闔以分輕重審清濁以訂虛實極五音六律之變分爲四聲八轉之異聲韻區分開卷在目總之得四萬餘字每一字而四聲隨之各曰韻書集成別爲直音篇乃韻之鈐鍵便學者之檢覽道常年八十餘歿後其子冕請邑侯吳克明壽梓直音將竣克明內召巡按劉魁以集成續爲鍍版成化十七年同邑徐博海虞桑悅及高唐劉魁皆有序直音篇則嘉靖己未因火補版張清所補序也集成入 四庫附存直音湮沒已久兩書合璧益可珍耳

新編篇海貫珠集一卷

明萬曆刊本

京都大慈仁寺沙門清泉真空編

是編一爲五音篇首歌訣二爲五音借部免疑海底金三爲檢五音篇海捷法總目四爲貼五音類聚四聲篇海捷法五爲訂四聲集韻卷數并韻頭總例六爲貼五音四聲集韻捷法總目七爲紉安玉鑰匙捷徑門法歌訣八爲類聚雜法歌訣大旨因五音集韻篇海卷帙較繁門目亦碎故立此捷法以便檢尋耳古音獵要五卷古音解五卷古音畧例一卷

明刊本

韓梅史藏書

蜀升菴楊慎用脩著

獵要凡七百十二字見於易象毛詩楚辭者止注其出處有辨證則稍詳見於韻補者止引其出處之目有改訂及增釋則詳古音餘則隨所記憶觸手成編往往參差互出畧例取易詩禮記荀管楚詞中有韻之文畧爲標例卷端並題李元陽校蓋用脩畏友也有等壽堂圖書印韓夔章印梅史氏三印梅史名夔章仁和人咸豐辛酉杭城再陷絕粒殉難

藏書志卷五

三

音韻日月鐙六十卷

明刊本

明新安

豫石呂維祺著

按維祺字介孺萬歷癸丑進士官至南京兵部尙書殉寇難弟維祐字泰孺由選貢爲樂平知縣抗節死贈按察司僉事明史並有傳其書爲韻母五卷以百六韻爲經三十六母四等爲緯開口合口則標部上獨音眾音則注字旁又同字鐸三十卷舉一百六部之字以三十六母易其前後本韻會而畧減其注本韻補以注古音通轉卷首有義例有圖說有音辨有採證又韻鑑二十五卷仍卽同文鐸之字標其若干音叶互注以便檢尋有義例八條三書皆自爲引言前有畢懋康楊文驄序

古今韻會舉要小補三十卷

明萬歷刊本

永嘉方日升子謙編輯

子謙萬歷間館於京山李維楨家成此書韻會舉要凡一萬二

千六百五十二字字數無所增損惟攷某音爲本某義爲正其餘音義附後或增一音以至數音必以其所從來者爲證增義亦然若字在他韻而可讀入此韻者則云古讀可叶入此韻者則云古叶亦並附於後雖偶有譌誤究有小補云維楨校正而再序之建陽令周士顯刻之東莞袁昌祚永嘉王光蘊並有序太古元音四卷

舊鈔本

何夢華藏書

晉陵是奎玉受編

是書不見於諸家著錄前有自序一篇云六書中有諧聲卽韻之所助唐虞則作息耕鑿謠於野薰風卿雲元首股肱歌於朝夏子諫獵怡君商孫思成頌祖姬公因象著爻孔子翼之俱用韻句與周詩相比而楚騷漢賦仍之則三代以前必有定本可按故啟口發聲自然相協降而六朝元音已佚沈隱侯僻處南陲僅採土音故釐正五方口吻固多謬戾而李唐來取士奉爲

科律嗣是而累朝輯古韻者各以私意爲增刪分併無慮數十家非濫遺卽複淆明洪武中命宋文憲合字內學士裁訂畫一賜名正韻疑亦近矣究亦未的因本梅誕生陽京陰基二韻定其宗而分爲四十五子十八母約而爲十五綱十八攝二十鈴爲經而總緯於四子二母離合讀之罔不順適覺人間一切謬言皆爲天籟遂以太古元音目其書其自負甚深今讀其書雖尙囿於明人之說未能如江永段玉裁姚文田之精通古韻言皆有據而應引自梁至崇禎以前十四家之說取其長闕其謬亦國朝儒生之留意韻學者矣是奎事蹟無攷今觀所引諸儒之說不及康熙間人當是順治康熙時人惟前自序籍貫曰晉陵知爲江蘇武進縣人耳此書前有何元錫印敬祉氏二方印後有錢塘何氏夢華館嘉慶甲子後所得書大方印

右小學類韻書之屬

善本書室藏書志卷五終

一
嘉善志卷五

三

善本書室藏書志卷六

錢塘丁丙松生甫輯

史部一

史記一百三十卷

明嘉靖震澤王氏刊本

漢司馬遷撰宋中郎外兵曹參軍裴駙集解唐朝散大夫國子博士宏文館學士河內司馬貞索隱諸王侍讀宣義郎守右清道率府長史張守節正義

前有索隱序補史記序正義序集解序索隱後序目後有震澤王氏刻梓篆文本記集解序後有震澤王氏刻于恩襲舊世之堂隸文本記索隱序後有跋云延詰不敏嘗聞先文恪公曰國語左傳經之翼也遷史班書史之良也今吳中刻左傳鄧中刻國語閩中刻漢書而史記尙未版行延詰因取舊藏宋刊史記重加校讐翻刻於家塾與三書並行於世工始嘉靖乙酉蜡月

迄丁亥之三月林屋山人王延詒識于七十二峯深處按錢警石學博甘泉鄉人稿云史記明刻本集解索隱正義皆備者以震澤王氏莆田柯氏本爲善王跋七行脫爛數字天祿琳瑯所藏亦然且多爲書估割去僞爲宋本此本跋字獨不脫爛可寶也

史記一百三十卷

明嘉靖柯維熊刊本

漢太史令龍門司馬遷撰唐朝散大夫國子博士宏文館學士河內司馬貞素隱諸王侍讀宣教郎守右清道率府長史張守節正義

前有嘉靖四年鉛山賀懋中序云史記苦乏善本雖陝西有副宋本江西有白鹿書院刊本差強人意余家故近白鹿猶未能購金臺汪諒得舊本懇諸大行人柯君奇徵徧求諸本參互攷訂兩歲始就視陝本尤精絕白鹿本無正義陝本雖有之而封

禪河渠平準三書特缺焉柯君悉增入焉後有嘉靖六年上元
日維熊自跋云凡一百三十卷五十二萬六千五百言併其注
內讐校之者亦未暇悉數蓋信者正疑者闕疑敢苟焉耳矣目
錄後有明嘉靖四年乙酉金臺汪諒氏刊行兩條甘泉鄉人稿
稱索隱序後有紹興三年四月十二日右修職郎充提舉茶鹽
司幹辦公事石公憲發刊至四年十月二十日畢工三十八字
凡三行始知柯本從紹興本翻刻也此書索隱序適闕僅能據
甘泉稿語一證耳維熊正德十二年進士官工部郎中

史記題評一百三十卷

明刊本

明李元陽輯訂高世魁校正

前列司馬貞索隱前後序張守節正義序正義論例謚法解列
國分野目錄題評諸儒名氏一百十六家此本爲嘉靖十六年
丁酉太和李元陽中谿按閩所刊亦具三家注惟索隱述贊不

錄而集諸家評語於書眉其不係名氏者則中谿說也卷前亦有不題輯校名氏者亦有數卷李元陽上增題楊慎者升菴謫戍太和惟中谿爲至交此本蓋卽升菴輯本因增益以付雕故題云爾明人好尙評論是書刻有評者蓋助於此凌稚隆評林實踵其後塵耳

漢書一百二十卷

宋麻唐刊明修本

班固撰祕書監上護軍琅邪縣開國子顏師古注

是書首行小名在上班固二字在中大名在下次行顏注銜名每葉二十行行十九字注二十五字至二十八字不等宋諱有缺筆版心注大德至大延祐元統補刊蓋宋刊元修之本愛日精廬藏書志有是帙并有後漢書款式補修與此悉同目錄之外前後無一攷證滬上更以此書來售按之卽屬此刻惟將次行顏注銜名改題鎮守福建都知監少監栢蒼馮讓宗和重修

卷末有天順五年孟冬讓修刊福唐郡庠書版跋云予奉命來
鎮福建福庠書集版刻年深詢知模糊幾缺過半不便觀覽心
獨惻然鳩工市版補刻云云始知宋刻於福唐者兼收並蓄之
益固如是耶

漢書殘本十四卷

宋嘉定建安蔡瑛刊本

拜經樓吳氏藏

漢護軍班固撰唐正議大夫行祕書少監琅邪縣開國子顏師古
集注

拜經樓藏書題跋云前漢書列傳十四卷每葉十六行行大十
六字小二十一字每卷首小名在上大名在下卷末書右將杭
本越本及三劉宋祁諸本參校其有同異並附於古注之下又
載正文若干字注若干字筆畫工整紙墨古雅洵宋刻之最佳
者後朱文藻周廣業陳焯鮑廷博錢馥邵志純盧文弨胥繩武
張燕昌黃丕烈錢泰吉或題或觀或校咸有印識皆不能定何

時何人所刊楊氏海源閣楹書隅錄載臧是書行款悉符目錄
前有木記云建安蔡琪純父所刻陸氏儀顧堂題跋宋槧蔡琪
一經堂本後漢書核與兔牀拜經樓所藏前漢列傳十四卷款
式相合則爲蔡刻無疑矣諸家跋印不及備載

漢書一百二十卷

明正統翻宋淳化本

祕書監上護軍琅邪縣開國子顏師古注

是書小題在上大題在下次行刊列顏氏銜名每半葉十行行
大十九字小二十七字四邊極粗版心上記大小字數下記正
統八年刻工姓名末有日雕修一行其日字上右奉淳化五年
七月二十五日等字已削去黃蕘圃士禮居藏書題跋云漢書
宋刻佳者淳化本不可得見景祐本殘者有之此外如建安劉
原起本又有一大字本皆名爲宋而實則不及元明刊本何以
明之蓋所從出本異也惟正統本最稱善以所從出爲淳化本

也避諱皆不及南宋其祖本真出北宋耳

前漢書一百卷

明嘉靖汪文盛刊本

劉燕庭藏書

漢班固撰唐顏師古注明汪文盛高穀傳汝舟校

宋監漢書始淳化次景德次景祐二年余靖王洙重校定下則
熙寧嘉祐宣和紹興先後凡七刻今惟景祐與紹興兩本猶見
舊藏家著錄 天祿後目有麻沙小字本前漢書攷證云舊祇
稱漢書此刻兩漢合刻故標題版心者加前字別之此本爲明
嘉靖汪氏所刊每葉二十四行行二十二字版心亦加前字當
出自元麻沙小字本而麻沙本又從景祐本出錢竹汀日記云
漢書嘉靖本卷首題福建按察司周采提學副使周琬巡海副
使何喬校刊末題嘉靖己酉年孟夏月吉旦侯官縣儒學署教
諭事舉人廖言監修注中附三劉說以白文原父貢父仲馮曰
字別之趙廣漢傳長老傳以爲漢興以來治京兆者莫能及北

宋乾興本無以來二字此本雖有之其增添痕迹分明故知原出北宋本也今細案周采等銜名實自後加其中汪高傳名字尙有剗削未盡者澈字宗呂號髯翁侯官人著有石門詩集汝舟字虛木澈同縣人有傳山人集卷首有劉喜海印燕庭燕庭藏書曾在蘇州吳校菴處諸印喜海字燕庭諸城人官浙江布政使文正公會孫文清公從孫也故庵名翌鳳吳縣諸生酷嗜異書手書祕冊幾及千卷

前漢書一百卷

明重刊元大德太平路學本

班固撰正議大夫行祕書省琅邪縣開國子顏師古注

前有師古序例目錄每半葉十行行廿二字亦大名在下班固二字居大名之上謹按天祿琳琅元版所列漢書帝紀十二卷年表八卷志十卷列傳七十卷前師古序例目錄後元孔文聲跋云江東建康道肅政廉訪司以十七史書艱得善本從太

平路學官之請編牒九路令本路以西漢書率先俾諸路咸取而式之置局於尊經閣致工於武林對讀者耆儒姚和中輩十五重校修補者學正蔡泰亨始大德乙巳仲夏是歲十二月太平路儒學教授曲阜孔文聲書此版雖縮狹小然款式行數字數實與九路刊者相同當從太平路學本重刻考元史地理志載江東建康道所隸者爲甯國徽州饒州集慶太平池州信州廣德八路鉛山一州鉛山無路之名豈統稱之爲路耶余所見者漢書之外則有甯國路刊後漢書池州路刊三國志信州路刊北史瑞州路刊隋書卽饒州路建康路刊新唐書卽集慶路而南史五代史未能定爲何路黃佐南雍志所載均稱集慶路無從考證矣

漢書音義三卷 精鈔本

蕭該撰該官國子博士時代事蹟無攷隋書經籍志已著錄則

爲六朝時人矣原書十二卷北宋時已佚此爲武進臧在東先生手輯雖較原書僅存四之一所引唐以前小學佚書若字詁字林三蒼碑蒼集韻諸書爲後之續輯小學鉤沈者所不廢不僅足校正漢書誤文也今東瀛新出唐惠琳一切經音義一百卷又彼國人所撰倭名類聚鈔二書引唐以前經史音義甚多此書亦所在徵引惜近日始流傳中國爲臧先生所不及見暇日當續爲搜輯增益俾無遺憾至唐以前爲漢書音者自應劭伏虔韋昭外尙有劉顯漢書音二卷夏侯詠漢書音二卷隋太子勇命包愷等撰漢書音二卷孔文詳漢書音義鈔二卷今皆不存而唐劉嗣等所撰漢書音義二十六卷亦同歸泯滅則是書之佚而復存宜史學家奉爲祕寶者矣

班馬異同三十五卷

明刊本

鮑氏知不足齋藏書

宋倪思編劉辰翁評

永樂壬寅八月楊士奇識云右史漢異同相傳作於須溪而編
內不載觀其評論批點臻極精妙信非須溪不能然文獻通攷
云倪思撰班馬異同三十五卷思以班史仍史記之舊而多刪
改務趨簡嚴或刪而遺其實或改而失其本意因其異可以
知其優劣所論政與今所錄者合而卷數亦同豈非書作於倪
而評論批點出於須溪耶舊有李元陽校弋陽汪田跋本此則
韓敬所序刊也思字正甫歸安人乾道二年進士歷官寶文閣
學士宋史有傳有沈令開印歛鮑氏知不足齋藏書鮑廷博印
三印廷博字以文號淦飲本歛人寄居桐鄉嘉慶十八年特
恩賞給舉人知不足齋者其藏書處也所刊叢書多人間祕本
後漢書一百二十卷

明正統觀宋淳化本

唐章懷太子賢注

是書行數字數格式與前書相同特夾注小字廿五字爲多卷

末云右奉渚化五年七月二十五日敕重校定刊正一條攷景
祐本卽出渚化本而大德本又出景祐本陳仲魚校大德本郭
太傳後左原十人均不跳行初太始至南州已下七十八字不
誤入正文與景祐本合餘則勝處尙多耳

後漢書一百二十二卷

明嘉靖汪文盛刊本

朱竹君對燕庭藏書

劉宋范曄撰唐章懷太子賢注明汪文盛高澂傳汝舟校

前有景祐元年九月祕書丞余靖上言卷端上列帝紀第一下
列後漢書一志三十卷前有梁劉昭補志序行數字數與前刻
同版心作后漢南北監本注多刪削此猶上祖景祐下承大德
謬譌尙少卽如鄭康成傳云師事京兆第五元先他本俱脫一
先字此獨不脫孔融傳父宙與漢碑合足徵是本之善有大興
朱氏竹君藏書印東武鐫氏味經書屋藏書印文正曾孫劉嘉
海印燕庭諸印竹君名筠字美叔又號簡河大興人乾隆甲戌

進士歷官侍讀學士左遷編修味經書屋者無錫秦文恭公藏書室也公名蕙田字樹岑晚以味經爲號乾隆丙辰進士第三

人及第歷官刑部尙書

後漢書一百三十卷

明人重刊元大德甯國路學本

范曄唐章懷太子賢注

前列景祐元年九月秘書丞余靖上言目錄後光武起後漢乙酉歲改建武元年傳及十二帝至獻帝建安二十五年庚申凡一百九十五年十二帝后紀一十二卷志三十卷列傳八十八卷首行小名在上中列范曄次行唐章懷太子賢注每半葉十行行二十二字與前漢書款式相同前漢係翻太平路學本此當翻自甯國路本也按甯國路本有大德九年乙巳河南雲謙跋云江東憲副伯都公語謙曰浙西十一經已有全版獨十七史則未也今文移有司董其役庶幾有成謙應曰此盛舉也宛

陵郡學分刊後漢書自大德己巳孟夏刻梓至仲冬書成版計二千二百四十有奇字計一百二十餘萬郡侯謹齋夏公力贊其成今此跋未見重刊姑記此以見元刻之源流焉

兩漢刊誤補遺十卷 舊鈔本

河南吳仁傑撰

仁傑字斗南又號蠔隱居士崑山人是書前有淳熙乙酉古汴留絳序云周益公遺親黨書曰斗南博物洽聞今之五總龜也其宰羅田之明年以書抵余曰我力貧刊是書且成子爲序之後有慶元己未迪功郎全州州學教授林瀛跋云太守陳公虔英出是命刊以淑學者是宋已兩刻矣 國朝朱昆田鈔自山東李開先家始流傳於世補遺者補劉攽兩漢刊誤二卷之遺也賁洽精確實出三劉之上惟宋志作十七卷今西漢居其八似東漢尚有佚卷也卷首有鄭氏寶藏迪人字篠沖周司徒之

裔三印

漢書考正後漢書考正六冊 影元本 稽瑞樓藏書

右書不著撰人姓名前後亦無序跋卷末有至正三年勤有堂刊本記當從元刻本影鈔者諸家書目罕見著錄所採皆蕭該劉敞劉放劉奉世章衡朱子文之語攷宋慶元時所刊漢書卷首有劉之問識語謂自宋景文校本外復得十四家善本逐一校讎云云核其所引諸書則蕭該漢書音義劉敞兩漢刊誤三劉漢書標注章衡編年通義朱子文漢書辨正均在焉疑此書爲南宋末年潛心兩漢書者所輯漢書攷正則從劉刊漢書錄出後漢書攷正僅據劉放刊誤別無增益蓋先賢校勘范書者遺著寥寥故所據僅此也元初此書人競傳寫故建安余氏據以登本自明以來久鮮傳本此帙爲乾隆以前影寫本撫寫甚精亦乙部中祕籍矣卷首有稽瑞樓白文長方印稽瑞樓者昭

文陳子準書樓也子準名揆嘗得唐劉餗稽瑞一卷故以名樓
儲藏之富甲於吳中

三國志六十五卷

元大德丙午池州路刊本

晉陳壽撰宋裴松之注壽字承祚安漢人舉孝廉官至太子中
庶子晉書有傳松之字世期聞喜人官中書侍郎司冀二州大
中正宋書有傳首有元嘉六年七月中書侍郎西鄉侯臣裴松
之上三國志注表凡魏志三十卷蜀志十五卷吳志二十卷壽
以魏爲正統習鑿齒始有異議紫陽亦慙之然壽爲晉臣晉承
魏祚僞魏卽僞晉也壽蓋甘蒙後世之詬病耳裴注引據賅洽
足爲考證之資傳是樓書目有宋刊二部咸平中有單刊吳志
此本每半葉十行行十九字注二十二三字不等卷前有大德
丙午日南至前進士朱天錫跋云江左憲臺命諸路學校分派
十七史鉅梓池庠所刊者三國志池之爲郡士類率多貧窶學

計歲入寡贏是舉幾至中輟總管王公亢宗與學宏才慨然以
化今傳後爲已任用能鳩工竣事郡學博士孔淳孫奉命董提
以底於成莫友芝經眼錄載在上海瞿氏所見者卽此

三國志六十五卷

南監刊本

南雍舊有集慶路學刊本萬厯丙申祭酒馮夢禎司業黃汝良
病其版刻漫漶重爲鏤行小名在上某書在中大名在下猶存
舊式每葉計二十四行每行二十三字刻法精善印工明湛夢
禎汝良並有序 天祿琳瑯亦爲著錄是書通部用朱藍二色
圈點朱筆爲順治十年藍筆爲康熙七年蜀志末記有新安徐
氏斗巖寓樓校畢等字墨筆爲雍正三年記有申受二字年旣
遼隔字蹟又不相類當爲彼此相承而讀者下筆不苟誠不易
得之籍惜借失數卷雖補配原刻究非完璧矣有汪寶詩印黃
雲孫所藏書籍諸印

三國志注補六十五卷

東潛趙氏稿本

晉平陽侯相安漢陳壽撰南宋中書侍郎西鄉侯聞喜裴松之注
仁和趙一清補

一清字誠夫昱之子也家有小山堂藏書富甲東南嘗注釋水
經四十卷刊誤十二卷著錄四庫以同時杭世駿補裴松之
三國志注之遺凡魏志四卷蜀志吳志各一卷猶有殘賸更采
集史傳諸子舊說按卷繫綴而別書補曰二字助證訂譌不無
裨益曾見原稿以馮刻三國志剪截原文原注黏貼素冊而自
書補注於其間用心可爲獨苦此本從原稿清出版格之心有
東潛趙氏定本六字劫中卷缺借硤石蔣氏藏原本補寫完帙
光緒十四年南皮張尙書之洞督兩廣設廣雅書局編刊史學
叢書會稽陶孝廉潛宜假是稿本攜粵以全志繁重節補注壽
之汗青跋其事於卷端按制府有書目答問世稱該博中列三

國志如洪駒孫之職官表洪亮吉之疆域志侯康之補注及補藝文志杭世駿之補注宋無名氏之辨誤陳景雲之國志舉正錢大昭之志疑潘眉之攷證沈欽韓之補訓詁釋地理諸目而獨未及此書其爲傳本之罕可知今得摘出刊傳殊可慰幸

晉書一百三十卷

宋刊小字本

王世貞毛晉宋犖馬藏藏書

唐太宗文皇帝御撰

貞觀中詔前後晉史十八家未爲盡善敕史官房喬等更加纂撰以陸機王羲之二傳太宗製贊故首題御撰今十八家之書並亡攷典午一代之事不能外此書也右爲宋刊小字本每半葉十四行行二十五字宋諱多缺筆字畫精雅奪目末有記云此書爲王弇洲先生所藏貞元本唐德宗年號印恰符先生名字故其祕冊往往摹而用之下必繼以三雅印此屬仲雅者嚮曾遭割裂想經先生改正余全史中原本亦係宋刻每多缺字

而此本特全洵可寶也湖南毛晉識有毛晉汲古注人印前有
貞元仲雅兩印藏書家每有以貞作鼎者微汲古識誤幾無釋
誤之日蔣生沐東湖叢記云曾入天籟閣繼歸宋牧仲故又有
商邱宋犖收藏一印又有臣筠三晉提刑二印筠乃中丞次子
也余從馬二槎上舍瀛家得之上舍吟香仙館書目中所載多
世所未見書舛州名世貞太倉州人嘉靖丁未進士歷官刑部
尚書犖字牧仲號漫堂又號西坡商邱人以蔭子官至戶部尚
書子筠字蘭揮官翰林院檢討

晉書一百三十卷

宋刊大字本

唐太宗文皇帝御撰

右書小題在上大題在下次行題御撰紀志傳記各爲起訖每
半葉十行行十九字宋諱均有缺筆或削不成字蓋宋刻而元
明遞修之十中如宣帝紀權果遺將呂蒙西襲羽公安羽字不

脫惠賈皇后傳繇密欲廢后欲不譌爲惠羊皇后傳賈后欲廢
欲不譌既何曾傳今忠賢執政今不譌令其進太宰侍中如故
中下不衍公字石崇傳春畦霍靡霍不譌蘿羊祐傳乞蒙列上
列不譌例兵不踰時踰不譌喻謝鯤傳吾不得爲盛德事矣句
下不脫鯤曰何爲其然但使自今以往日忘日去耳初敦謂二
十字皆是正監本毛本之誤其他得以勘譌之處尙不少也後
附音義三卷唐天寶初何超令升撰宏農楊齊宣正衡序之宋
史藝文志誤作齊宣撰

宋書一百卷

宋刊明修本

臣沈約新撰

約字休文吳興武康人累官特進光祿侍中少傅初謚文改曰
隱所著晉書百十卷宋書百卷齊紀二十卷高祖紀十四卷邇
言十卷諡例十卷宋文章志三十卷文集一百卷今惟宋書存

爲紀十志三十列傳六十與隋書經籍志卷數合然不言有表也此爲紹興眉山所刻七史之一小題在上大題在下每半葉九行行十七字版心上記字數下列刻工姓名其宏治嘉靖間修版者則無之志第十二末有校語列傳第六有臣穆等按高氏小史云云二條北監本屏入正文官本仍之毛氏本志十二連正文列傳六列於後蓋未察此爲嘉祐諸臣校語當時刊削未盡耳穆當屬鄭穆宋史本傳稱在館閣三十年嘗編集賢院書籍者也

梁書五十六卷 宋刊明修本

散騎常侍姚思廉撰

唐書思廉本傳稱貞觀三年詔思廉同魏徵撰藝文志亦稱梁書陳書皆魏徵同撰舊本獨標思廉蓋不沒其秉筆之實而每卷後題陳吏部尚書姚察或加題史官者蓋思廉憑父舊稿加

以新錄亦推本父之遺意耳此本亦眉山所刻七史之一行款
格式與宋書同惟字畫刊工不及宋齊北齊陳魏周六書之善
致有疑爲書估取宋殘版加以明刻稱爲邇邇本是也然汪士
鍾藏宋刻梁書不避南宋諸諱每冊有禮部官印版式極寬大
每半葉九行行十八字鮑廷博定爲北宋本其實卽屬此刻眉
山覆梓在紹興十四年安得預避南宋之諱耶儀顧堂續跋云
與北監汲古兩本對校謬奪不可枚舉彌見舊刻之珍貴

北齊書五十卷

宋刊明修本

隋太子通事舍人李百藥撰

百藥奉敕撰纂蓋承其父德林之業猶姚思廉之繼姚察也晁
氏郡齋讀書志稱是書殘缺不完列傳之中無論贊者十九卷
有贊無論者一卷有論無贊者五卷傳文多似補綴而成非其
本書按本紀卷三末有校語云臣等詳文襄紀其首與北史同

藏書志卷六

十二

而末多出東魏孝靜紀其間與侯景往復書見梁書景傳其所
序列傳尤無論次蓋雜取以成此書非正史也本紀第五第七
列傳第二第四第六第七第二十五第二十六二十七卷末有
云此卷牽合北史而成第二十一卷末云此卷雖北史而無論
贊尙非正史卷二十九末云此傳與北史同而不序世家又無
論贊疑非正史以上各條似皆嘉祐時校刊諸臣所記與陳書
南齊書同曾鞏陳書序所謂特疏於篇末者是也南監本尙仍
其舊汲古本始去之錢大昕以卷三校語出自嘉祐諸臣所記
餘皆明人所記良由未見此蜀大字本耳此亦眉山七史之一
周書五十卷

宋刊明修本

令狐德棻等撰

前有臣蕭臣安國臣希校上序乃氏梁氏王氏林也卷則大題
在下小題在上每葉十八行每行十七字版心有字數及刻工

姓名列傳第二十二二十三後有削而未盡校語兩行此亦紹興十四年蜀眉山七史本之世皆議是書殘缺多取北史以補其亡又多竄亂篇次既非盡出德棻亦非盡出李延壽之舊然貞觀中修梁陳周齊隋五史發議於德棻而德棻專領周書魏公武讀書志稱宋仁宗時出太清樓本合祕閣本又取夏竦李巽家本下館閣是正其文字其後林希王安國上之仁宗時至紹興眉山重刻爲時未久何至殘闕若是其言不可信也按周史本有柳虯牛宏二家安知德棻不采柳牛二史以成之耶是本校毛刻得以勘其譌者無慮數十處彌見宋刻之善矣

隋書八十五卷

元大德瑞州路刊本

特進臣魏徵上志太尉揚州都督監修國史上柱國趙國公臣長孫無忌等奉敕撰

卷末有天聖二年五月十一日上御藥供奉藍元用奉傳聖旨

齊禁中隋書一部付崇文院至六月十五日敕差官校勘時命臣綬臣煜提點右正言直史館張觀等校勘觀尋爲度支判官續命黃鑑代之仍內出版式造天祿琳瑯有南宋嘉定刊本此本每半葉十行行廿二字版心間有堯學浮學雙溪番泮樂平等字堯學爲饒州學之省文浮學爲浮梁縣學番泮爲鄱陽學樂平爲樂平州學雙溪始爲書院名是屬元大德乙巳瑞州路所奉刊而從北宋本出者也愛日精廬所藏卽是此本

南史八十卷

元大德丙午刊本

李延壽

延壽事蹟附新唐書令狐德棻傳延壽承其父大師之志爲北史南史而南史先成大抵因宋齊梁陳四史舊文稍爲刪潤補闕少而削繁多又就正令狐德棻改定乖失宋人故稱佳史此本大名亦在下每半葉十行行廿二字序闕一葉文義不貫末

葉云郡侯呂公師皋提綱於先繼蒙郡同知張公雲翼偕僚屬振領於後遂成此書江左後學感廉使幸惠之德不淺蜀人朝東寅忝郡文學黽勉與力僭序顛末大德丙午立夏書中閭雖有嘉靖修版然如謝瀹傳實與劉悛飲曰謝莊兒不可云不能瀹曰苟得其人自可流涵于日悛甚慚案悛爲劉劭子流涵同音瀹以悛斥其父名引張景陽七命之文以報之悛故慚汲古本不知悛父名勔又習見沈涵罕見流涵改流涵爲沈涵則瀹之敏不見而悛之慚不可解矣王儉傳昇明二年爲長兼侍中汲古本妄於長下加一史字餘則一二字之譌難以盡舉矣北史一百卷

元大德信州路刊本

李延壽

延壽表進北史稱本紀十二卷列傳八十八卷與今卷數合蓋家世北方見聞較近用力綜述深於南史如周則補文苑傳齊

則補列女傳出酈道元於酷吏附陸法和於藝術具有鑑裁宋以後若魏若北齊若周三朝故實賴之維繫此本首行大題在下每半葉十行行廿二字與南史版匡一式版心間有刊削未盡之信州路學刊本等字蓋亦元大德間九路所刊之一陸存齋藏本版心有信州路儒學刊信州象山刊象山書院刊道一書院刊稼軒書院刊藍山書院刊玉山縣學刊弋陽縣學刊貴溪學刊上饒學刊等字蓋印本在前也明北監與汲古本魏本紀帝乃告諸大臣爲與魏和親計四十二年遣子文帝如魏與魏如魏皆改晉不知此時晉未受禪安得如晉此本不誤他如涼武昭王有譌爲梁武長城大狩有譌爲長城太守者蓋不及此本之佳

南北史識疑四卷

寫本 王西莊藏書

寶歷王懋竑予中著

懋竝康熙戊戌進士安慶教授雍正癸卯 召直內廷改翰林院編修有朱子年譜白田雜著生平長於考證自抒心得南史凡一卷北史凡三卷有王鳴盛鳳階甲戌榜眼通議大夫光祿卿之章西莊居士諸圖記鳴盛字鳳階晚號西沚別號西莊居士乾隆十九年第二人及第歷官內閣學士兼禮部侍郎銜左遷光祿寺卿

舊唐書二百卷

明嘉靖刊本

逸野王氏藏書

監修國史推誠守節保運功臣特進守司空兼門下侍郎同中書門下平章事上柱國譙國公食邑五千戶食實封四百戶臣劉昫等奉敕修皇明奉敕提督南畿學政山西道監察御史餘姚聞人詮校刻蘇州學儒學訓導門人嘉興沈桐同校

石晉劉昫涿州歸義人五代史有傳而未言撰此書是書所述長慶以前本紀惟書大事簡而有體列傳敘述詳明瞻而不穢

頗能存班范之舊法自新唐書出此書僅僅流傳不絕明聞人
詮字邦正餘姚人嘉靖丙戌進士由寶應知縣擢山西道御史
督學南畿酷志刊復吳令朱子得列傳於光祿張氏長洲賀子
得紀志於守溪公乃紹興初年朱倬忤秦檜出爲越州教授時
所刊本因督蘇庠司訓沈桐校刊詮自爲序東吳菴生楊循言
翰林待詔文徵明並爲序嘉靖十八年沈桐更詳記惠借藏書
捐俸助膳分番校對出資經費諸人姓名於後此帙許益齋增
佐軍徽州得以見贈有太原世家逸野王氏家藏在邦萬梧深
處飛泉樓印諸印

唐書二百五十卷

宋嘉祐刊本

汪氏藝芸精舍藏書

歐陽修奉敕撰宋祁奉敕撰

卷首以公亮監脩故冠推恩佐理功臣正奉大夫尙書禮部侍郎
參知政事柱國廬陵郡開國公食邑二千一百戶實封二百

戶賜紫金魚袋臣曾公亮奉敕提舉編修銜名列傳爲宋祁所
定故題端明殿學士兼翰林侍讀學士龍圖閣學士朝請大夫
守尚書吏部侍郎充集賢脩撰臣宋祁奉敕撰陳振孫書錄解
題謂舊例修書止署官高一人名銜歐公曰宋公於我爲前輩
且於此書用力久何可沒也遂於紀傳各著之宋公感其退讓
云作者大旨以事增文省求勝舊書劉安世謂此卽新書之失
也是書曾公亮進書表及目錄已佚卷末列二十一帝本紀一
十篇一十卷十三志五十篇五十六卷三表十五篇二十二卷
列傳一百五十篇一百六十卷錄一卷每葉三十行行二十五
字版心窄狹幾不能容首行大題亦在下仁宗以上諱匡胤恒
禎及嫌名殷敬鏡境貞等字皆缺筆而不及英宗以下殆嘉祐
時所鏤版也謹按 天祿琳琅著錄是書稱行密字整結構精
嚴與此正同惟中有節闕之卷與藝芸精舍藏目錄卷相符誠

祕笈也有汪士鐘印閬源眞賞兩印士鍾字閬源別號三十六峯主人吳縣人藏書之室曰藝芸精舍有藏書目行於世

唐書二百二十五卷

元大德建康路刊本

翰林學士兼龍圖閣學士朝散大夫給事中知制誥充史館修撰判祕閣臣歐陽脩奉敕撰

此書爲元大德九年建康路明道書院監刊有建康路學錄戚明瑞序云大德丙午拜都侍御持節江東嘗欲部下各路分刊十七史昇所鈐者唐書建康路推官呂承務提其綱前甘州路教授趙伯升日蒞四學監造且敦儒尋友縷緝毫聯自一校至三校用心亦勤時僕鼓篋昇序命述其事云前有校勘官十二人中有溧水學教授屠約溧陽學教授仇遠乃杭人也約字存博號月汀官至徽州教授遠字仁近號仁父官至杭州知事著有金淵集山邨集版式行數字數與隋書同天一閣愛日精廬

同藏此本

五代史記七十四卷

宋慶元刊本

歐陽脩撰徐無黨注

唐以後所修諸史惟此爲私撰故褒貶祖春秋敘述祖史記而事實不甚經意當時實未上於朝修歿後始詔取其書付國子監開雕遂至今列爲正史無黨注淺陋相傳既久存而不廢前有建安陳師錫序云五代距今百有餘年故老遺俗往往垂絕無能道說者史官秉筆之士或文采不足以耀無窮道學不足以繼述作使五十餘年廢興存亡之迹姦臣賊子之罪忠臣義士之節不傳於後世來者無所攷焉惟廬陵歐陽公慨然以自任蓋潛心累年而後成書其事迹實錄詳於舊記而褒貶義例仰師春秋由千古而來未之有也至於論朋黨宦女忠孝兩全義子降服豈小補哉此本版之徑圍縮小每半葉十行行十八

字版心有字數刻工姓名朗匡等諱皆缺筆有慶元五年魯邵
曾三異校本等字其黑口之葉則元時補也三異字無疑從朱
子學改訂纂修皆以屬之扁其讀書堂曰仰高魏鶴山爲記有
虞山堃老印曹炎印彬侯印卷一後有朱筆記云戊戌正月二
十四日用葉石君所藏舊監本子對讀末有崇禎戊寅臘月廿
三日收藏等條

五代史記七十四卷 元大德刊本

歐陽脩撰徐無黨注

是本版刻闊大每半葉十行行二十二字實元大德乙巳丙午
九路所刊無序無跋不知何路分刻耳間有嘉靖九年脩葉鈐
有會稽包氏宜仲家藏見堂之印兩圖記

五代史記七十四卷 明刊小字本

宋歐陽脩撰徐無黨注明汪文盛高濂傅汝舟校

前有陳師錫序每葉二十四行行二十二字版式與文盛所刊兩漢書同惟字畧肥天一閣所藏皆此本文盛所刻儀禮注疏兩漢及此書皆高傳兩人同校也

宋史四百九十六卷

明成化刊本

錢穀藏書

開府儀同三司上柱國錄軍國重事前中書右丞相監修國史領經筵事都總裁臣脫脫奉敕修

前有至正五年中書右丞相阿魯圖左丞相別兒怯不花前右丞相脫脫等進宋史表目錄後有校勘臣彭衡暨丁士恒十人姓名凡四百九十六卷本紀四十七志一百六十二表三十二列傳世家二百五十五書成藏之祕閣或有錄者珍過拱璧志學之士願見不得明成化十六年總督兩廣軍務兼理巡撫御史桂陽朱英先得鈔本於漳浦陳布政家微有殘缺再於浙中得善本始謀僚屬繕刻自爲之序開卷首行大名在下猶存舊

式此卷末有錢氏叔寶記云嘉靖甲寅冬十一月沈立洲所贈
宋史內缺志九卷刻傳二十四卷手自鈔完藏於十友齋穀記
所鈔卷端鈐錢穀古吳錢氏收藏印句吳逸民錢氏叔寶諸印
後又有咸豐八年吳門陸僕記云錢叔寶先生諱穀吳縣人少
貧失學迨壯遊文待詔門日取架上書讀之閒有異書輒借觀
鈔錄幾於充棟是書爲先生手校末誌嘉靖甲寅屈指已三百
有五年矣先君子冰簟先生云余家於康熙初得於崑山葉氏
又傳數世至嘉慶甲子先君子重加裝訂並錄蘇州府志文苑
錢穀傳有陸僕之記陸沆之印靖伯等印

遼史一百六十卷

元至正刊本

黃堯國汪閩原藏書

開府儀同三司上柱國錄軍國重事前中書右丞相兼修國史領
經筵事都總裁臣脫脫等奉敕修

卷前有至正三年三月十四日三月二十八日聖旨兩道其一

云篤憐帖木兒怯薛等奏遼金宋三國史書不曾纂修來歷代
行來的事跡合纂修成書有俺商量來如今選人將這三國行
來的事跡交纂修成書俺定擬了呵怎生奏呵奉聖旨那般者
其一復文事語畧同又脫脫等進遼史表修史官員都總裁總
裁官纂修官提調官及校勘諸銜名凡紀三十卷志三十一卷
表八卷列傳四十六卷國語解一卷書雖脫脫表上而分纂者
爲廉惠山海牙王沂徐昺陳繹曾以二百年之事實又書禁素
嚴之國遺籍無徵不及一載遽爾蕞功宜乎潦草疏畧矣此書
每葉二十行行二十一字版心列刊工姓名乃浙江行省杭州
府刊版也有黃丕烈蕘翁汪士鐘印三印丕烈字紹武號蕘圃
晚號復翁吳縣人乾隆戊申舉人家富藏書得宋刻百餘種顧
莖顏其室曰百宋一廬其藏書室曰士禮居又曰讀未見書齋
同縣潘文勤刻其藏書題跋行於世

遼史拾遺續三卷

原稿本

何夢華舊藏

松陵楊復古列歐輯

復古字慧樓震澤人乾隆壬辰進士截取知縣振奇好古著述等身乾隆五十九年八月復古自序曰遼史文筆簡嚴而事多疏畧厲徵君鶴特爲拾遺二十四卷博采旁搜粲然大備矣第當時舊五代史尙沈晦於永樂大典中未經寓目而契丹國志宋元通鑑棄置孔繁不免語焉弗詳之憾因更爲之續以三書爲綱而以散見他書者附益之得四百餘條分爲三卷云烏程汪曰楨識云列歐所著尙爲汪氏振綺堂刊行頗有增鼠改爲拾遺補非楊氏之舊此猶原稿也然余所見如路振乘輶錄見晁伯宇續談助陳襄神宗皇帝卽位使遼語錄見古靈集金王介儒撰降封天祚爲海濱王詔見郝經續後漢書苟宗道注引金寶錄孝子齊陶見澤州志宋致遼國書百餘通見宋大詔令

厲楊二家皆未及采然則此書尙可更續也有復吉列歐藝芳
閣三印

元史二百十卷 明洪武刊本

翰林學士亞中大夫知制誥兼修國史臣宋濂翰林待制承直郎
兼國史院編修官臣王禕等奉敕修

首有洪武二年八月十一日銀青榮祿大夫上柱國錄軍國重
事中書左丞相兼太子太師宣國公臣李善長進元史表稱翰
林學士臣宋濂待制臣王禕協恭刊裁儒士臣汪克寬胡翰宋
偉陶凱陳基趙壘曾魯趙沆張文海徐尊生黃篪傅恕王錡傅
著謝微高啟分科纂修上自太祖下迄甯宗據十三朝實錄之
文成百餘卷若元統以後則其載籍靡存已遣使而旁求俟續
編而上送所撰本紀三十七卷志五十三卷表六卷傳六十三
卷目錄二卷又凡例五則其書倉卒而成最爲草畧順帝時事

雖採補亦復不詳太祖嘗命解縉改修書亦不成承修秉筆之
儒當時豈不知旁搜博采以成信史乃期限既迫斧鉞可畏
勉効勤但期免咎後世何可議其短長哉

明南監二十一史

嘉靖萬厯先後刊本

按黃佐南雍志梓刻本末云金陵新志所載集慶路儒學史書
梓數正與今同則本監所藏諸梓多自舊國子學而來自後四
方多以書版送入洪武永樂時兩經修補版既叢亂旋補旋亡
成化初祭酒王俱會計之已逾二萬篇宏治初始作庫樓儲藏
嘉靖七年錦衣衛閒住千戶沈麟奏准校刊史書禮部議以祭
酒張邦奇司業江汝璧學博才裕使將原版刊補其廣東原刻
宋史差取付監遼金二史原無版者購求善本翻刻以成全史
邦奇等奏稱史記前後漢書殘缺模糊剗補易脫莫若重刊後
邦奇汝璧遷去祭酒林文俊司業張星繼之乃克進呈云云今

存史記一百三十卷嘉靖九年祭酒張邦奇司業江汝璧校刊
有橘煌之印又列萬厯二年祭酒余有丁司業周子義校刊題
字又列萬厯二十四年祭酒馮夢楨序司業黃汝良同校刊前
漢書一百二十卷嘉靖八年祭酒張邦奇司業江汝璧校刊後
漢書一百二十卷嘉靖八年祭酒張邦奇司業江汝璧校刊三
國志六十五卷萬厯二十四年祭酒馮夢楨序司業黃汝良重
鑄版晉書一百三十卷前有舊版嘉靖戊午刊補萬厯十年祭
酒高啟愚司業劉城重修刊宋書一百卷萬厯二十二年司業
馮夢楨序祭酒陸可敬司業季道統校刊南齊書五十九卷萬
厯十七年祭酒趙用賢司業張一桂序并校梁書五十六卷萬
厯三年祭酒余有丁序稱南雍故藏二十一史版多漫漶梁書
尤甚武林許侍御三省督饒淮陽捐鍰付梓同司業周子義校
有汪士鋐退谷藏印陳書三十六卷萬厯十六年祭酒趙用賢

序司業余孟麟同校刊魏書一百十四卷萬厯二十四年祭酒
馮夢楨司業黃汝良同校刊并同序北齊書五十卷萬厯十六
年祭酒趙用賢序同司業張一桂校刊周書五十卷萬厯十六
年祭酒趙用賢司業余孟麟同校刊隋書八十五卷萬厯二十
二年祭酒李道統校刊南史八十卷萬厯十七年祭酒趙用賢
司業張一桂校刊并題辭北史一百卷萬厯二十年祭酒鄧以
廣司業劉應秋校正前祭酒陸可敬前司業馮夢楨同校闕并
序新唐書二百五十五卷前有舊版嘉靖萬厯間監官先後重
補新五代史七十五卷萬厯四年祭酒余有丁司業周子義校
刊宋史四百九十六卷成化十六年總督兩廣兼巡撫朱英刊
嘉靖丁巳取入監重補修刊遼史一百十六卷嘉靖八年祭酒
張邦奇司業江汝璧依元刻本校刊金史一百三十五卷嘉靖
八年祭酒張邦奇司業江汝璧依元刻本校刊最爲精善元史

二百十卷本洪武舊版崇禎間祭酒侯恪司業謝德溥補刊嘉靖七八九年張祭酒江司業祗重刊史記前後漢書遼史金史凡五部其餘舊版尙未全壞萬厯以來相隔又數十年不得不重新鑄版皆非舊監之遺矣尙有小字本史記元刊明修三國志則無從併收彙列也

明北監二十一史 萬厯間刊本

明萬厯間奉敕刊史記附宋裴駟集解唐司馬貞索隱張守節正義一百三十卷前有貞索隱前後二序補史記序駟集解序守節正義序論例諡法解祭酒劉應秋司業楊道賓校刊漢書唐顏師古注一百卷前有師古漢書序例漢余靖刊誤進表宋祁參校諸本目錄劉之問識語劉應秋方從哲校刊後漢書唐章懷太子賢注一百三十卷內志三十卷梁劉昭注前有宋余靖序李廷機方從哲校刊三國志宋裴松之注六十五卷敖文

禎蕭雲舉校刊晉書一百三十卷後附唐楊齊宣序並音義三卷方從哲校刊宋書一百卷方從哲黃汝良校刊南齊書五十九卷前有宋曾鞏序蕭雲舉李勝芳校刊梁書五十六卷蕭雲舉李勝芳校刊陳書三十六卷前有宋曾鞏序李勝芳校刊魏書一百十四卷前有宋劉放等序李廷璣方從哲校刊北齊書五十卷李勝芳校刊周書五十卷前有宋梁燾等序蕭雲舉李勝芳校刊南史八十卷楊道宸蕭雲舉校刊北史一百卷方從哲黃汝良校刊隋書八十五卷方從哲楊道宸校刊唐書二百二十五卷前有曾公亮等進書表後附宋董衝唐書釋音二十五卷蕭良有葉向高校刊五代史七十四卷前有宋陳師錫序敖文禎黃汝良校刊宋史四百九十六卷方從哲黃汝良校刊遼史一百十六卷前有脫脫進書表沈淮校刊金史一百三十五卷前有阿魯圖進書表李勝芳校刊元史百十卷前有李善

等進書表蕭雲舉重校刊其全史奉敕重修者祭酒吳士元司業黃錦也自萬厯二十四年開雕閱十有一載至三十四年竣事皆從南監本繕寫刊刻雖行款較爲整齊究不如南監之近古且少譌字內三國志精校勝於南監兩刻並存豈非合則雙美哉

右正史類

善本書室藏書志卷六終